

BRC boleh menarik lebih banyak pelaburan langsung asing

BANDAR SERI BEGAWAN, Rabu, 11 Mac. - Penyelidikan merupakan satu *domain* yang penting yang menjadikannya keutamaan strategik (*strategic priority*).

Penyelidikan yang dibuat bukan sahaja diharuskan akan dapat memberikan impak kepada pengembangan pengetahuan dan pemikiran akademik termasuk pelajar, malahan ia juga memberikan impak kepada ekonomi negara melalui inovasi.

Menteri Pendidikan, Yang Berhormat Pehin Orang Kaya Seri Kerna Dato Seri Setia (Dr.) Haji Awang Abu Bakar bin Haji Apeng menjelaskan demikian pada Mesyuarat Pertama dari Musim Permesyuaratan Kesebelas Majlis Mesyuarat Negara (MMN) yang bersidang pada hari kelima di Dewan Majlis, MMN, di sini.

Schubungan dengan itu, jelas Yang Berhormat, sebagai kelompok penyelidikan (*research clusters*) telah dibentuk di institusi-institusi pengajian tinggi di negara ini yang merangkumi beberapa bidang teras seperti Biodiversiti, Tenaga, Agroteknologi dan Keselamatan Makanan (Food Security and Agrotechnology), Pengajian Asia, Perbankan dan Kewangan Islam, Minyak dan Gas, Teknologi Hijau dan Penyelidikan Mazhab Shafiee.

Yang Berhormat menjelaskan, secara keseluruhan, sebanyak 11 pusat penyelidikan telah ditubuhkan di semua institusi pengajian tinggi di negara ini dan kesemua pusat ini mempunyai kolaborasi antarabangsa dan sering kali menerima kunjungan para ahli akademik unggul.

"Pusat-pusat ini diharapkan akan mencapai status pusat kecemerlangan penyelidikan di peringkat antarabangsa yang

menjadi sumber rujukan yang berkualiti tinggi serta menjadi pemangkin dalam menghasilkan inovasi ilmu. Contoh hasil penyelidikan setakat ini ialah pemfailan 32 paten oleh Universiti Brunei Darussalam (UBD) di negara ini, Singapura, Malaysia dan Amerika Syarikat," ujar Yang Berhormat.

Sebagai langkah ke hadapan, menurut Yang Berhormat, kita akan berusaha dalam mengkomersialkan paten yang dihasilkan.

Di bawah geran penyelidikan melalui Majlis Penyelidikan Brunei (Brunei Research Council - BRC), jelas Yang Berhormat lagi, UBD telah menerima sejumlah BND92 juta untuk menyokong 38 projek penyelidikan dan daripada jumlah ini, 10 telah siap dan 21 sedang giat dijalankan.

Melalui geran penyelidikan ini, tambah Yang Berhormat lagi, pelbagai hasil dan manfaat telah diperolehi seperti pembangunan kapasiti kepakaran tenaga tempatan dan infrastruktur, penajanaan profil penyelidikan antarabangsa bagi Brunei Darussalam dan pengajian tinggi khususnya, pemfailan paten dan penciptaan peluang *commercialisation*, faedah sosial dan alam sekitar kepada masyarakat, dan penerbitan kertas saintifik dan persidangan antarabangsa.

"Seperti yang telah dinyatakan, salah satu manfaat besar hasil geran melalui BRC ini ialah pembangunan kapasiti tenaga tempatan bagi keperluan kaedah penyelidikan dan teknik yang saintifik. Penglibatan dalam projek ini termasuklah dari luar UBD seperti para guru sekolah menengah, Jabatan Tenaga di Jabatan Perdana Menteri, Jabatan Perkhidmatan Elektrik, Jabatan Meteorologi, Jabatan Saliran dan

Laporan : Saerah Haji Abdul Ghani

Foto : Mohd. Sahrizal Haji Said, Dk. Nur Hafilah Pg. Osman

Pembentungan, Berakas, Power Management Company dan sebagainya. Selain itu, pihak UBD telah dapat membuat kerjasama penyelidikan bersama institusi-institusi penyelidikan bertaraf dunia dan syarikat-syarikat antarabangsa yang ternama seperti IBM, Pixela dan Sengenics," ujar Yang Berhormat.

Bagi tujuan tersebut Yang Berhormat berharap agar inisiatif ini akan dapat menarik lebih banyak Pelaburan Langsung Asing (Foreign Direct Investment) pada masa yang akan datang.

Menyentuh mengenai peningkatan profil di arena antarabangsa, jelas Yang Berhormat, UBD pada tahun 2014 Masihi telah berjaya mendapat kedudukan dalam sistem *ranking* dunia, iaitu QS Asia, dengan mencapai kedudukan universiti ke 171-180 di Asia.

"UBD juga telah mencapai kedudukan 50 teratas dalam beberapa kriteria tertentu. Alhamdulillah, pihak Institut Teknologi Brunei (ITB) dan Universiti Islam Sultan Sharif Ali (UNISSA) pada masa ini juga sedang berusaha untuk diiktiraf di peringkat antarabangsa melalui usaha-usaha strategik yang telah dikenal pasti," jelas Yang Berhormat.

Yang Berhormat menambah, pengajian tinggi memainkan peranan penting dalam pembangunan negara terutama dalam melahirkan *knowledge society* dan ia merupakan jentera dalam melahirkan modal insan yang berkapsiti tinggi dalam mempertingkatkan sosioekonomi



MENTERI Pendidikan, Yang Berhormat Pehin Orang Kaya Seri Setia (Dr.) Haji Awang Abu Bakar bin Haji Apeng.

negara.

Menurut Yang Berhormat lagi, pengajian tinggi juga dikenal pasti bukan sahaja sebagai pencipta pengetahuan (*knowledge creator*), malahan ia juga pereka inovasi

"UBD juga telah mencapai kedudukan 50 teratas dalam beberapa kriteria tertentu. Alhamdulillah, pihak Institut Teknologi Brunei dan Universiti Islam Sultan Sharif Ali pada masa ini juga sedang berusaha untuk diiktiraf di peringkat antarabangsa melalui usaha-usaha strategik yang telah dikenal pasti."



(creator of innovations).

Dalam pada itu, jelas Yang Berhormat lagi, ia juga merupakan penjana ekonomi melalui pelbagai usaha R&D (*research and development*) dan komersial dan dengan itu, inisiatif ke arah ini harus dikawal secara strategik agar ia lebih efektif dan pelaburan ke arahnya akan bermanfaat.

"Ke arah itu, Kementerian Pendidikan sebagai peneraju utama pembangunan pengajian tinggi di negara ini sedang dalam proses merangka Pelan Strategik Pengajian Tinggi. Pelan strategik ini perlu bagi memastikan dasar, hala tuju dan inisiatif strategik institusi-institusi pengajian tinggi di negara ini adalah selaras dalam mencapai hasrat Wawasan Brunei 2035," tegas Yang Berhormat.

Tangani kelambatan pemilihan calon ketua kampung

Laporan : Siti Muslihat Haji Salleh

Foto : Mohd. Sahrizal Haji Said, Dk. Nur Hafilah Pg. Osman

BANDAR SERI BEGAWAN, Rabu, 11 Mac. - Skim Perkhidmatan Penghulu dan Ketua kampung yang



YANG Berhormat Awang Haji Tahamit bin Haji Nudin.

baharu yang menggantikan Skim Perkhidmatan Baharu 2013 yang sedang dalam pertimbangan pihak-pihak berkenaan akan menentukan jawatan ketua kampung itu benar-benar jawatan yang dapat melaksanakan kepimpinan di peringkat akar umbi sesuai dengan perkembangan dan taraf pengetahuan dan ilmu orang ramai di kampung masing-masing.

Menteri Hal Ehwal Dalam Negeri, Yang Berhormat Pehin Udana Khatib Dato Paduka Seri Setia Ustaz Haji Awang Badaruddin bin Pengarah Dato Paduka Haji Othman berkata, skim tersebut memberikan peluang kepada calon-calon yang terdiri daripada orang yang berpendidikan, di samping berpengalaman.

Ketika mengulas persoalan yang dibangkitkan oleh Yang Berhormat Awang Haji Tahamit bin Haji Nudin mengenai kelambatan proses

mencari calon ketua kampung, Yang Berhormat Menteri Hal Ehwal Dalam Negeri menambah, kementerianinya sedang berusaha untuk menetapkan satu kadar sekurang-kurangnya 33 peratus jumlah penduduk yang layak mengundi berbanding dengan pengalaman-pengalaman proses pengundian yang lalu yang ada di antaranya tidak mencapai 25 peratus penduduk yang layak mengundi.

Perkara tersebut dibahasakan pada Mesyuarat Pertama dari Musim Permesyuaratan Kesebelas Majlis Mesyuarat Negara (MMN) yang bersidang pada sebelah petang hari kelima di Dewan Majlis, Bangunan MMN.

Persidangan menyambung semula perbincangan Rang Undang-Undang (2015) Perbckalan, 2015 / 2016 yang membincangkan Kementerian Hal Ehwal Dalam Negeri dan jabatan-jabatan di bawahnya.

Menurut Yang Berhormat, antara mekanisme lain yang dirancang termasuklah meletakkan sepanduk-sepanduk bagi pemberita-

huan mengenai pengundian calon ketua kampung, selain mendaftarkan pengundi-pengundi yang terdiri daripada penduduk kampung yang layak mengundi di setiap kampung.

Tidak semestinya kosong jawatan tersebut tetapi setiap kampung itu mesti ada pendaftaran bagi penduduk yang layak.

"Apabila ada pengundian, mereka ini akan dipanggil, dijemput dengan diberikan kad sebagai pengundi. Apabila mereka datang mereka akan mendaftarkan sebagai pengundi. Kalau sah memang orang yang dipanggil, maka kadnya itu akan ditukar dengan kad undi. Ini akan lebih *transparent* dalam pemilihan ketua-ketua kampung. Mudah-mudahan perkara ini akan dapat dilakukan," jelas Yang Berhormat dengan penuh harapan.

Menyentuh mengenai cadangan yang juga diusulkan oleh Yang Berhormat Awang Haji Tahamit untuk menubuhkan Skwad Khas Separuh Tentera bagi menangani keselamatan pegawai-pegawai imigrasi yang menghadapi risiko penjenayah sama ada dari dalam dan luar negara, Yang Berhormat



MENTERI Hal Ehwal Dalam Negeri, Yang Berhormat Pehin Udana Khatib Dato Paduka Seri Setia Ustaz Haji Awang Badaruddin bin Pengarah Dato Paduka Haji Othman.

Menteri Hal Ehwal Dalam Negeri berpendapat setakat ini penubuhan skuad semacamnya tidak perlu ditubuhkan.